

# Pasukan Enactus UMS bantu m'rakat pendapatan rendah

NST 21.6.13 6



DI BUKIT HARAPAN... Sebahagian daripada komuniti Bukit Harapan yang bertanggungjawab menguruskan dan memastikan keberlangsungan UNFOLD.

KOTA KINABALU: Pasukan Enactus Universiti Malaysia Sabah (UMS) melaksanakan program komuniti di bawah naungan Projek UNFOLD yang bertujuan untuk membantu golongan miskin khususnya di kawasan bandar baru-baru ini.

Antara komuniti yang disasarkan oleh kumpulan itu adalah golongan ibu tunggal, orang buta, anak-anak yatim, dan orang kurang upaya di seluruh Sabah.

Enactus UMS telah membantu golongan tersebut untuk menjana pendapatan sampingan bagi meringankan beban mereka melalui penghasilan produk kraftangan.

Beberapa bengkel kraftangan seperti kemahiran membuat gelang tangan dengan menggunakan botol plastik dan pembuatan key-chain daripada tin aluminium telah dijalankan oleh pasukan Enactus UMS kepada penghuni Rumah Kebajikan Bukit Harapan dan Rumah Anak Yatim Tambunan.

Pengarah Projek Komuniti UNFOLD, Aarston Friend Dickson berkata, projek yang dijalankan oleh pasukan Enactus UMS itu akan membantu meningkatkan tahap sosio-ekonomi peserta program tersebut secara langsung mahupun tidak langsung.

"Penjanaan idea kreatif dan pelaksanaan projek UNFOLD merupakan salah satu inisiatif pasukan Enactus UMS untuk meningkatkan taraf hidup golongan kurang berkemampuan di negeri Sabah," katanya ketika menyampaikan ucapan perasmian program tersebut.

Menurut salah seorang penghuni Rumah Kebajikan Bukit Harapan, Oliver, penganjur bengkel oleh Enactus UMS itu mampu mengajarnya menghasilkan produk kraftangan dengan menggunakan bahan kitar semula.

"Program seperti ini amat menyeronokkan dan dapat membangkitkan semangat kami untuk terus memperbaiki taraf hidup kami," ujar beliau.

Enactus UMS berharap agar ilmu dan kemahiran yang dikongsi dapat membantu komuniti sasaran untuk hidup berdikari serta berdaya saing pada masa hadapan. Pasukan Enactus UMS turut menyeru seluruh warga tempatan untuk menyokong Projek Komuniti UNFOLD. Segala sumbangan dan juga sokongan boleh disalurkan kepada Rumah Kebajikan Bukit Harapan, Rumah Anak Yatim Tambunan dan Persatuan Orang Buta Sabah.